

## L'auwe, li tchèt èt li r'naud

Virlitche èt cougnaude, è mitan d'on tinre yèrbadje,  
One auwe adouyeut dès bèdots.  
Èt todi s' cotaper avou on crâne coradje,  
Qu'i djaliche, nîver ou ploûre à gogo.

Si tranquile troupia todi mwinrné al baguète,  
Ele cwinkîye s'i va su l' costé.  
Sèpant fwârt bin qu'i l'zî faut choûter leû champète,  
Lès londjins chûvenut sins moufter.

D'ossi trisses saîsons à fé l'ovradje d'on gârdyin  
Vos laîyenut afîye sins coradje.  
Èt n' pus sondjî qu'à viker one miète dins l' trayin,  
Diviser avou d's-ôtes visadjes.

Adon qu'i baloûjeneut on djoû d' l'après quatre eûres,  
On bia craus èt mauvaîs byin d' tchèt  
Rèscotère noste auwe yèrtchant tote si mwaîje umeûr.  
Tot fiant l' forvanteû, i lî dit :

« Godôye ! Vos 'nnè satchîz one di mâwe, mi p'tite fèye !  
Vos-èstoz sins nisse pace qu'on n' fait nin après vos ?  
Dji sèreu à vosse place, waî, dji chûvreu m' consèy,  
Dji lêreu vosse yède di bèdots sins leû tchipot.

Vinoz avou mi ! Fwè d' marou, dji v's-acèrtinéye  
Qui v's-aloz awè dès tchaurnants momints à make,  
Èt viker à vosse môde, sins rat'na, totes vos-idéyes.  
Poqwè v' lèyî miner pa tos lès tchic èt tchac ? »

Purdant po èvanjîle li lingadje dau marou,  
Li sote auwe, sins tûzer pus lon,  
Plôye sès bagadjes po-z-aler fé lès quate cents coups...  
Dès bêladjes, vos, gn-aurè pupont !

A pwin.ne avin.n'-t-i bèrlandé saquants cints mètes  
Qu'i crwèsenut on r'naud avou si stoumac' à s' dos.  
Li tchèt potche abîye al mérecopète d'one glôriyète...  
Mins l' dôdéye blanke auwe, lèye, èlle a sièrvu d' fricot.

Çu qu'i-gn-a à rit'nu :  
N'alez nin crwêre lès ramadjes dès fieûs d' manigances,  
Vos-auroz insi sogne di ç' qui v's-avoz d'avance

Pierre Lazard  
Fevr. 2012